

Umhverfis- og auðlindaráðuneytið
Skuggasundi 1
101 Reykjavík

Akureyri, 16. september 2020
UST202009-039/H.V.
04.04

Efni: Samráðsgátt – mál nr. 169/2020. Drög að frumvarpi til laga um breytingu á lögum um náttúruvernd

Vísað er til máls nr. 169/2020 í Samráðsgátt stjórnvalda þar sem kynnt eru drög að frumvarpi til laga um breytingu á lögum nr. 60/2013 um náttúruvernd.

Umhverfisstofnun gerir eftirfarandi athugasemdir:

Í 2. gr. b. frumvarpsins er lögð til breyting á 2. mgr. 38. gr. þar sem segir „við 2. mgr. bætist nýr málslíður svohljóðandi: Ekki er þörf á að ákveða hvaða flokki friðlýstra svæða lagt er til að viðkomandi svæði muni falla undir fyrr en drög að friðlýsingarskilmálum, sbr. 39. gr., eru unnir.“ Umhverfisstofnun bendir á að breytingin felur ekki í sér efnislega breytingu á ákvæðinu en með henni er skerpt á því að ekki er þörf á að ákveða friðlýsingarflokk fyrir svæði strax í upphafi undirbúnings friðlýsingar.

Í ljósi þess að auglýsing um friðlýsingu felur í sér stjórnvaldsákvörðun gagnvart landeigendum og öðrum réttihöfum þess landssvæðis sem friðlýsingin tekur til og að verndarmarkmið mismunandi friðlýsingaflokka eru ólík hefur Umhverfisstofnun leitað við að færa fram upplýsingar um tilgang og markmið verndar fyrir þau svæði sem til greina kemur að friðlýsa sem og upplýsingar um þann flokk friðlýsingar sem horft er til, eins fljótt og verða má. Er það og í samræmi við stefnu stofnunarinnar um gagnsæja stjórnsýslu. Stofnunin bendir á nauðsyn þess að almenningur geri sér grein fyrir hvað felist í auglýstum áformum friðlýsingar. Ef friðlýsingarflokkur kemur ekki fram í auglýsingu þarf að lágmarki að tilgreina markmið og tilgang fyrirhugaðrar friðlýsingar, þ.e. hverju ætlunin er að ná fram með friðlýsingunni. Einnig bendir Umhverfisstofnun á að fremur ætti að tilgreina hvað eigi að koma fram í auglýsingu í stað þess að tilgreina hvað þurfi ekki að vera í auglýsingu.

Umhverfisstofnun leggur því til eftirfarandi tillögu að orðalagsbreytingu á 2. gr. b. frumvarpsdraganna: „Við 2. mgr. bætist nýr málslíður svohljóðandi: Í kynningu skal að lágmarki tilgreina markmið og tilgang fyrirhugaðrar friðlýsingar.“

Hvað varðar kortlagningu óbyggðra víðerna telur Umhverfisstofnun jákvætt að í náttúruverndarlög verði bætt skyldu til að kortleggja óbyggð víðerni. Stofnunin telur þó skorta frekari umfjöllun, m.a. um tilgang slíkrar kortlagningar og réttaráhrif, hvernig

þeirri vinnu skuli háttað og hvort að gert sé ráð fyrir samráði við hagsmunaaðila, þ.m.t. landeigendur.

Umhverfisstofnun tekur undir aðrar breytingartillögur sem fram koma í frumvarpinu.

Virðingarfyllst


Elín Björg Ragnarsdóttir
sviðsstjóri
Hildur Vésteinsdóttir
teymisstjóri